



**Najugaqatigiiffinni tamani pisortanit pigineqartuni ajornartorsiutip siusissukkut iliuseqarfigneqartarnissaa siunertaralugu inissiani attartortittakkani aqqissuussamik ikinnerpaamik ukiumut ataasiarluni oqoqassutsimik misissuisoqartalernerata aningaasatigut allaffissornikkullu kingunerisassaannik qulaajaaviusussamik Naalackersuisut nassuiaasioqqullugit peqquneqarnissaannik Inatsisartut aalajangiiffigisassaattut siunnersuut. Nassuiaammi taamatuttaaq qitiusumik qarasaasiatigut paasissutissaasivimmik assigisaanilluunniit misissuinernik nalunaarsuiviusussamik pilersitsineq eqqarsaatigalugu tamatumani aningaasatigut kingunerisassai qulaajarneqassapput. Najugaqartunut oqummik sapigalinnut pisortallu inissiaataanni attartortittakkami oquttumi najugaqarsimanerup malitsigisaanik nappaateqalersimasunut immikkut ilisimasalinnit peqqissutsikkut ikiorsiinissamut tapersuinissamullu neqerooruteqartoqartalerpat tamatuma aningaasatigut kingunerisassai nassuiaammi qulaajarneqassapputtaq.**

(Inatsisartunut ilaasortaq Anna Wangenheim, Demokraatit)

## **Siullermeerneqanera**

Siullermik Inatsisartut ilaasortaq Anna Wangenheim, Demokraatit qutsaviginiarparput siunnersuutaanut.

Naleqqamiit ajuusaarutigaarput una siunnersuut, qanorluunniit siunertaa torratsigigaluarpat, qinersineq sioqqutilaarlugu maanna oqallisigineqalermat, kivisussangornera avaqqunneqarsinnaangimmat.

Taamaasilluni nunatsinni innuttaasut peqqissusaanut oqallinneq pisariaqarluinnartoq kinguarsarneqaaqqinnialermat.

Naleqqami ineqarnermut politikkitsinni qitiuttipparput, ullumikkut attartuisuusut immikkut ikiortariaangitsut, inigisartit akeqangitsumik pissagaat. Pisortallu pigisaat inissiat tassaassasut inuiaqatigiitsinni sanngiinnerusortagut ikiortariallit pilersugassaralugit, aammalu ilinniarnep nalaani kinguninngualu piffimmi aaliangersimasumi pilersugassagut.

Qanorluunniillu avaqqunneqarsinnaangilaq nalunaarsuisariaqarsinnaaneq, pisortat inissiaataani oqummik arlaatigulluunniit pisariqarsinnaasunik nalunaarsuisarsinnaaneq. Tassami pisortani inissiaqarneq akisussaaffiuvoq qulakkeerinnittussaataaneramik ilalik, innuttaasut najungaqartut soorunami napparsimalertassangimmata, inissiatsinni najungaqarnertik ilutigalugu.

Akuersarneqarsinnaangilaq ersarissumik sukumiisumillu takussutissaqangikkutta ajornartorsiutit qanoq annertutigineranik.



# Naleraq

Pisortalli inissiaataani ajornartorsiutit uteqqiasut, sooq pilertarnerat qiviartariaqarparput.

Ukiorpasuarni nunatsinni ineqarnermut politikki qitiusumiit aqunneqarsimavoq, aserfatsaaliineq naammaginangivittoq aammalu ineqarnermut akeqartitsineq kaaviiartitsisoq, isertitallu atorfissaminnut tutsinneqarnerannut aqutsineq tulluortoq piusimanngitsoq.

Avataaneersut aaliangiisartunik aqunneqarnitta kingunerisa ilaat, nunatsinnilu aningaasaqarnikkut kiffaanngissuseqannginnitta kingunerisaanik, peqqissunik ininik peqarsinnaanata.

Uuma siunnersuutip aamma takutippaa sooq nunasiaataajunnaarsaaneq oqarluartaarnermik ingerlanneqarsinnaannginnera, isumaqaannarata iliuuseqarnissamik killiffeqarnerput. Qanoq akuersaarujorsinnaavarput innuttaasoqartoq, pisortat inissiaataani najungaqartoqartoq peqqissusertik akigalugu.

Akuersaaruminaapporlu pisariaqartitaat kinguarsarneqartarnerat aammalu kivisarnerat qinersinissaq qallinera ilutigalugu.

Naleqqamiit periusissiaqarpugut, siunnerfeqarpugut, piffissaq ungasinnerusumut qulakkeerinninnissamik innuttaasut inissianik aqutissiussallugit.

Sulissutigissavarpullu ajornartorsiut siunissamut kinguartinniaqattaarnagu, namminiilivinnissatsit tigussaasumik takorluukkap timitalernissanut.

Kalaallit, uagutsinnut aallaavigaluta, qanoq nunarput ineriartinniarnarlugu, peqqissuserput inuunerpullu pilluitiginagit iliuuseqarnissaq tullinnguuppoq.

Qujanaq